

Sodisfazion pe colaborazion ARLeF e Ente Friuli nel Mondo

Un cors di lenghe furlane online pal Fogolâr Furlan di Tokyo

ARLeF e Ente Friuli nel Mondo a puartin la lenghe furlane a Tokyo. Al è stât inviât ai 6 di Març il prin cors di lenghe furlane “a distance”, un progjet pilote pal Fogolâr Furlan gjaponês, che i doi ents a stimin di podê slargjâ in curt ancje a altris Fogolârs intal mont.

A fâ i auguris ae classe te ocasion de prime lezion, a jerin il Diretôr de ARLeF William Cisilino e il President di Ente Friuli nel Mondo Adriano Luci, insiemi ancje cu la Vicepresidente Anna Pia De Luca.

Tra i arlêfs, invezit, ancje il President dal Fogolâr di Tokyo, Flavio Parisi. La domande di vê un cors e je partide propit di lui e al è stât il so interès fuart a puartâ la ARLeF a ativâ cheste gnove modalitât di formazion.

Il cors - che propit parcè che al è sperimentâl, al ven inviât cuntun grup piçul - al ven fat une volte par setemane fin al mêis di Jugn, cuant che si sierarà cu la prove finâl. Obietif principâl al è formâ lis competencis scritis e in particolâr l’ûs de grafie uficiâl. In classe al è ancje cualchi gjaponês, che za al fevele la lenghe furlane. Docent al è Michele Calligaris, che al lavore li de sede centrâl dal Sportel Regionâl pe Lenghe Furlane e al à une lungje esperience. Lis leziions a distance si fasaran in colegament video, in graciis de disponibilitât di une sale preparade di pueste li de sede de Region Friûl-Vignesie Julie di vie Sabbadini.



Il prin colegament cun Tokyo. Di man çampe: Anna Pia De Luca, Adriano Luci, William Cisilino e Michele Calligaris

“La lenghe furlane e je part de nestre identitât e i nestrîs zovins, sedi in Friûl che tal forest, i tegnin tant al furlan - al dîs il president de ARLeF, Eros Cisilino -. Cun di plui, mi fâs tant plasê che tra i arlêfs al sedi ancje cualchi gjaponês apassionât de nestre lenghe.”

“O sin sodisfats une vore di cheste colaborazion - al dîs Adriano Luci, President di Ente Friuli nel Mondo - e o dîs graciis ae ARLeF par vê organizât e promovût il cors. Vuê, midiant de tecnologie, al è dal sigûr plui facil fâ leziions

a distance. O vin vût za domandis di altris Fogolârs, tra chescj chel di Buenos Aires, e o sperin di podê dâ in curt une continuitât a chest progjet”.

L’inviamet dal cors al è stât precedût intai dîs passâts di un incuintri tra il President de ARLeF Eros Cisilino e Anna Pia De Luca, Vicepresidente di Ente Friuli nel Mondo, par condividi cualchi riflessione su gnûfs progjets che a metaran dongje i doi ents intai prossims mêis.

**A Gurize, lis celebracions de Fieste de Patrie dal Friûl 2019
 3 DI AVRÎL, NASSITE DI UNE NAZION**

La Fieste de Patrie dal Friûl e celebre il 3 di Avrîl dal 1077, la zornade che a Pavie l’imperadôr Indri IV al à decretade la nassite dal Stât Patriarcjâl Furlan. Il Stât furlan, guviernât dal Patriarcje, al veve leçs propriis, un so esercit, al bateve monede e al jere un jenfri i teritoris statuâi plui grançj de epoche. Intal 1420, dopo di une lungje vuere, al fo concuistât di Vignesie.

La prime edizion de Fieste de Patrie dal Friûl si è davuelte intal 1977: e je stade ideade di pre Francesco Placereani (pre Checo Placerean) te ocasion dal inovâl dai 900 agns e si è celebrade a Aquilee. Dal 2002 indevant, la manifestazion e à otignût la adesion des istituzions furlanis principâls.

Intal 2015, cu la aprovazion de leç regionâl n. 6, la Region Friûl-Vignesie Julie e à ricognossût in maniere uficiâl cheste ricorence cul intindiment di valorizâ la storie di autonomie dal popul furlan.



La bandiere dal Friûl, za in ûs intal ‘300, e je une tra chês plui antighis de Europe. No si à di confondile cun chê de Region, create intal 1963, dulà che la acule e rapresente Rome.

LA ANTIGHE BANDIERE DE PATRIE

La bandiere dal Friûl - ricognossude uficialmentri par leç - e je formade di un drap di forme retangolâr cun tal centri une acule eraldiche di aur cun alis spleadis, cjâf a çampe, bec viert e sgrifis rossis, suntun cjamp celest. Cheste bandiere e je une di chês plui antighis in Europe: di fat e nas de antighe steme de Patrie dal Friûl, za in ûs intal ‘300, che il so esemplâr plui prezios (dal 1350, apartignût al Patriarcje Bertrant) al è conservât intal Museu dal Domo di Udin. La bandiere dal Friûl no va confondude cun chê de Region Friûl-Vignesie Julie, che e à une origjin cetant plui resinte (1963) e dut un altri significât storic: su la bandiere regionâl la acule e rapresente Rome che e socor Aquilee, rapresentade de tor.

IL PRIN PARLAMENT DE EUROPE

Il Parlament de Patrie dal Friûl al è, daûr di cualchi studiôs, chel plui antîc de Europe. Al nassè des assembleis consultivis dai nobii e dal clericât, clamadis dal Patriarcje di Aquilee tacant dal secul XII par domandâ gnovis contribuzions in monede e in oms di armis. Intal zîr di pôc timp, par altri, il Parlament de Patrie al assumè funziions legjislativis, aministrativis e judiziariis simpri plui grandis. Intal Parlament, dongje dai nobii e dai eclesiastics, a sentavin ancje i rapresentants dai Comuns. Cheste istituzion e je stade in vore par plui o mancûl 600 agns, fin al 1805 cuant che e je stade soprimude di Napoleon.

Tal prossim numar si fevelarà des celebracions de Fieste de Patrie dal Friûl a Gurize.